



LIS VACINIS INTAL ADULT

CHESTE SCHEDE E FURNÏS INFORMAZIONI PAR CAPÎ CUALIS VACINIS CHE A SON RACOMANDADIS INTE ETÂT ADULTE.

Par informazions su lis vacinis dal frut che al contati il Pediatri o il Servizi pes Vacinis de sô Aziende pe Assistance Sanitarie.

CE ISE UNE VACINE?

Si trate di un farmac che al jude a prevignî lis infezions provocadis di bateris e di virus.

PARCÈ ISAL IMPUARTANT VACINÂSI?

La vacine e je un strument sigûr e zovevul che al protêç:

- la proprie salût;
- la salût des personis che a son ator di nô, so redut des personis plui debilis (par esempi fruts e anzians che no puedin vacinâsi, personis che a sofrissin di altris malatiis).

La vacine e je sigure e zovevule in cualsisedi fase di etât.

CUI AIAL DI VACINÂSI?

- Dutis lis personis a àn di vacinâsi par evitâ di inmalâsi di tetan, pertòs, difterite, varuscli, parotite, rosolie e vuarvuele mate.
- Lis personis cun plui 65 agns a varessin di vacinâsi pe influence e pe polmonite, ancje se no àn problemis di salût.
- Po dopo, ciertis personis a àn un pericol plui alt di contrai malatiis specifichis infetivis, in particolâr:
 - cui che al sofrìs za di altris malatiis o che al cjol medisinis che a indebilissin lis difesis imunitariis;
 - cui che al fâs cierts lavôrs tant che operadôrs sanitaris, educadôrs e insegnants, militârs, operadôrs ecologjics, forestâi;
 - cui che al à stîi di vite/compartaments particolârs: personis cun tancj compagns sessuâi, omosessuâi, cui che al fâs ûs di sostancis stupefacentis;
 - cui che al viaze in regjons specifichis dal mont.

Se al fâs part di une des categoriis indicadis, che al domandi informazions al so mie-di o al operadôr dal Servizi pes Vacinis de sô Aziende su tropis e cualis vacinis che al à di fâ.

CEMÛT VACINÂSI?

La plui part des vacinis a son soministradis cun iniezioni intal muscul de spale (muscul deltoide), dome cualchidune e je di cjoli par bocje.

**DULÀ VACINÂSI?**

- Li dal Servizi pes Vacinis de Aziende pe Assistance Sanitarie di residence.
- Li dal propri miedi di famee.

Ogni volte che al va a fâ une vacine che al puarti cun se il libret des vacinis e la documentazion di ricovars, visitis e esams precedents.

PRIME DI FÂ LA VACINE AL È BEN INFORMÂ L'OPERADÔR SANITARI SE:

- si à o si à vût di pôc timp fiere o altris disturps tant che par esempi dissenterie, sintoms di influence;
- si sofris di malatiis cronichis tant che par esempi il diabete, la insuficiencie renâl, lis malatiis cardiachis o polmonârs, la epatite, la epilessie;
- si cjol medisinis e cualis;
- si vûl fâ viaçs tal forest e dulà;
- si spiete o si intint vê un frut.

Cun di plui, si à di visâsi di dî al miedi, al infermîr o al assistent sanitari cuale che e je la ativitât di vore che si fâs, e se al si à vût eventuâi compartaments a pericol.

AL MOMENT DE VACINE, CHE AL DOMANDI AL OPERADÔR SANITARI:

- cetantis dosis di vacine che al à di fâ;
- par cetant timp che la vacine e protêç de infezion;
- cuâi disturps che al pues vê dopo la vacine;
- cemût compartâsi in câs di fiere o di altris sintoms.

CHE AL DOMANDI SIMPRI CHE I SCLARISSIN CE CHE NOL COGNÒS O CHE LU PREOCUPE. CHE AL CJAPI NOTE CULÌ SOT, PAR NO DISMENTEÂSI, DES DOMANDIS CHE AL STIME IMPUARTANT FÂ:

Zenâr dal 2016

Par cure dal grup referents aziendâi "Handbook lis vacinis intal adult".

I autôrs a declarin che lis informazions contignudis in cheste informative no àn sponsorizacions o conflits di interès.

Lis informazions contignudis no cjapin il puest dal rapuart miedi/infermîr e pazient.